

太平寰宇記

第三册



太平寰宇記卷之七

河南道七

許州

許州

潁川郡今  
理長社縣

禹貢豫州之域星分房宿二度周爲

許國左氏傳許太嶽之後說者謂炎帝之裔周武

王伐紂所封于此又徙于葉魯昭公九年又遷于

夷今亳州城父縣是也至十三年又自夷遷居于

葉十八年又遷于白羽定公六年爲鄭所滅自後

復立爲鄭附庸邑周末爲晉地三卿分晉其地入

韓七國時爲韓魏二國之境秦并爲潁川郡理陽

翟兩漢爲潁川之許縣後漢末曹操迎獻帝自洛  
都于許文帝雖云都洛其宮室武庫多在許州卽  
今許昌縣也又西魏大統十三年詔遣河南行臺  
大都督王思政進據潁川東魏遣將清河王高岳  
率眾十萬攻思政思政不與戰岳造高堰引洧水  
以攻之十五年城陷水自東北入城思政爲岳所  
執卽今長葛縣之長社故城也北齊高澄於此改  
立南鄭州周大定元年改爲許州治長社焉隋初  
不改大業初州廢又爲潁川郡唐武德四年平王  
世充改爲許州領長社長葛許昌繁昌黃臺濼強

臨潁七縣貞觀元年廢黃臺灑強繁昌三縣以洧  
州之扶溝鄆陵汝州之襄城嵩州之陽翟北澧之  
葉縣來屬十三年改置都督府管許唐陳潁四州  
而許州領長社長葛許昌鄆陵扶溝臨潁襄城陽  
翟葉九縣十六年罷都督府顯慶二年割陽翟屬  
洛州開元四年割葉襄城置仙州二十六年仙州  
廢以葉襄城陽翟來屬其年又以葉襄城屬汝州  
二十八年又以襄城來屬是歲又以葉屬汝州天  
寶元年改爲潁川郡乾元元年復爲許州長慶元  
年廢潁州爲郟城縣來屬本忠武軍節度梁開平

二年改爲匡國軍唐同光元年復舊至皇朝因之

元領縣八 今七

長社 長葛 臨潁 許昌 陽翟 郟城 舞

陽

一縣割出

鄆陵 入開封府

州境

東西一百五十五里 南北二百五里

四至八到

東北至東京二百一十五里

西北至西京三百三十里

西至長安一千二百六十里

東至陳州二百八十里

正南微東至蔡州三百二十里

北至鄭州一百八十里

西南至汝州一百八十里

東南至陳州三百里

西北至河南府三百三十里

戶

唐開元戶一萬九千七百一十七

皇朝戶主萬八千五百四十六客二萬一千九百九十一

風俗

潁川本有夏之國夏人尚忠其弊鄙樸有申韓之餘烈高仕宦好文法人以貪悞爭訟為俗然漢韓延壽黃霸繼為郡守先之以敬讓化之以篤厚風教大行

姓氏

潁川郡八姓 陳 荀 鍾 許 庫 于 鮮 于 鮮



人物

賈山

長社人漢孝文時言治亂之道

韓稜

穎川舞陽人實憲威權震天下尚書以下

議欲拜之稱萬歲稜正色曰禮無為臣稱萬歲之制議者皆慙

荀淑

穎川人李膺師

謂之有子八人

或

淑之孫二十人為尚書令

鍾皓

長社人

陳

寔

許人

李膺

襄城人客造如登龍門

辛毗

穎川陽翟人魏文帝欲徙冀州

十萬戶實河南毗入

繁休伯

穎川人文才機捷

鍾會

諫帝起毗引其裾入

庾峻

驛陵人長

松表五字司馬景王曰真王佐才也

棗據

長社人

褚彥回

陽翟人

土產

絹 麁心布 乾柿 黃明膠

長社縣舊十鄉今五鄉漢舊縣地屬潁川郡始因社中樹暴

長故縣名長社焉蓋鄭長葛之地春秋隱公五年

宋人伐鄭圍長葛卽此也隋文帝廢郡以縣屬汴

州大業三年改爲潁川縣唐武德四年復爲長社

改屬許州望烟山無峰岫高岳圍王思政於此

置烽燧因有望烟之號南北玉山高岳慕容紹

宗圍潁川築此兩山窺望城中高陽里在州城

西門內道南荀氏家傳荀淑有子八人皆賢其地

舊稱西豪里潁陰令范康曰昔高陽氏有才子八

人荀公亦有才子八人乃改西豪爲高陽里時同

郡陳寔爲太邱長奕葉賢德往詣荀門陳君使元  
方爲御季方從後孫子長文尚幼抱之于膝荀使  
叔慈應門慈明行酒自餘六龍侍側孫文若猶小  
坐之于懷言語三日德星爲之聚太史奏曰五百  
里內有賢人集故德星爲之聚因名其里曰德星  
鄉今郡城西南故宅是也 犬城鄭公孫射犬城

長箱城東魏行臺清河王高岳率眾圍西魏將  
王思政因築此城以車箱爲樓因名長箱城 故  
陶城東晉陶侃征杜弼於此屯軍因築此城在今  
縣西南 故魯城左傳鄭伯請以泰山之祊易許

田而祀周公卽此城也 狼溝左傳所謂楚子師  
于狼淵也 靈泉九州要記云許昌靈井亦曰靈  
泉今石砌方正民必禱焉 張騫冢漢武帝使尋  
河源封博望侯今郡有冢存 潁水在縣西南三  
十里地理志陽乾山潁水所出東至下蔡入淮  
德星亭在縣西北一里漢雜事云陳太邱父子相  
聚之處 晁錯墓在縣東北二里錯潁川人漢御  
史大夫請削諸侯地者郡有冢存 鬪雞臺在縣  
東北五里唐開成中廉使杜悰築 荀爽兄弟八  
冢在縣東北七里爽本潁川人今地名荀村里名

高陽神道碑存 灌夫冢在縣北三里爲漢將軍  
潁川記云潁水清灌氏寧潁水濁灌氏族無何潁  
水色變果爲族滅 七星井各方七步俗云汲一  
井則餘井水皆動五井在縣東北二里二井在縣  
正北二里 澗水經縣西俗謂之勅水源出大驄  
大驄山唐元和八年雨水摧其山而出流盪居  
人溺死者千餘人

長葛縣

北六十里舊二鄉今九鄉

古鄭邑也春秋謂宋人伐鄭圍

長葛俗亦呼爲長平城漢爲縣屬潁川 沙水爾  
雅云過爲洵潁爲沙汝爲瀆卽此水也 東偏城

在縣東北五里左傳齊鄭伐許許莊公奔衛齊以許與鄭鄭伯使許大夫百里奉許叔以居許東偏又使鄭大夫公孫獲處許西偏今有東西兩城

故潁國城在縣西一里潁侯之國也蓋春秋時長葛之地宋人伐鄭圍長葛卽此也 縣理長箱城

東魏武定五年清河王岳率眾圍西魏將王思政于潁川因築此城初以車箱爲樓因名長箱城隋開皇六年乃于此立縣 長社故城在縣西一里

西魏大統十三年詔遣河南行臺大都督王思政進據潁川東魏遣將清河王岳率眾十萬圍潁川

思政不與戰岳造堰引洧水以灌城十五年潁川城陷水自東北入城思政爲岳所執卽此城也

鍾繇臺在縣西十里魏東武亭侯鍾繇學書臺在繇故宅中今臺址尙存又有鍾繇冢 陳寔冢在縣西三十五里漢太邱長之冢也陳氏家傳云紀諶已下八十六墓三十六碑並在長葛縣陘山之陽又有廟存

臨潁縣

東南六十里舊七鄉

漢縣屬潁川郡今縣在臨潁皋上

潁水東崖俗謂之臨潁皋其實岡阜也隋大業四年自故城移于今理開皇三年罷郡以縣屬許州

唐建中二年屬澉州貞元二年州廢依前屬許州

臨潁皋東西長五十里即龍脾岡也嵩高山記

嵩山東南三百里有龍脾其地沃壤可居即此也

今臨潁縣理在此岡上潁水西北自長社縣界

流入繁昌城魏志文帝行至曲蠡乃為壇于繁

陽受禪改元曰黃初以潁陰之繁昌亭為繁昌縣

壇前有二碑一是百官勸進碑一是受禪碑並鍾

繇書于後其碑六字生金論者以為司馬金行故

曹氏六世也青陵臺水經注云潁水東南流經

青陵亭北白臺按水經注云繁昌縣城內有三



臺此其一也

銅陽城

銅音紂

在縣西南四十里古

銅陽縣也在銅水之陽故曰銅陽城 大陵城卽

鄭地也在縣東三十里卽陳蕃爲亭長所辱處

參龍城在縣西四十里卽古參龍氏之邑也昔董

父實甚好龍能求其嗜慾以飲食之龍多歸之舜

賜氏曰參龍參養也及夏孔甲擾于上帝帝降之

乘龍雌雄各一有劉累學擾龍于參龍氏以事孔

甲夏后賜氏曰御龍今汝州魯山縣卽御龍氏邑

又汝州有大龍山並劉累養龍之所 尙書臺卽

魏文受禪有黃鳥銜丹書集于尙書臺卽此也

許昌縣

東北五十五里  
舊五鄉今四鄉

其地姜姓四岳之後太叔所

封爲楚所滅後以爲許縣屬潁川郡又魏略云後

漢建安元年魏太祖迎獻帝都于許卽爲此邑也

魏文帝卽位改許縣曰許昌縣按今縣南四十里

許昌故城是也宋志無許昌縣天平元年復置高

齊文宣帝省鄆陵入許昌隋文帝又以鄆陵縣置

洧州以縣屬焉大業二年廢洧州以縣屬許州初

魏武旣破黃巾經略四方而苦軍食不足羽林監

潁川棗祇建置屯田於是以任峻爲典農中郎將

募人屯田許下

卽今許昌縣也

得穀百萬斛郡國列置田

官數年之間所在倉儲盈積 許昌宮在許昌故  
城中楊修作許昌宮賦卽此宮也 魯城在縣南  
四十里左傳鄭伯請以泰山之祊易許田而祀周  
公卽此城也 剛城史記秦昭王五十二年拜燕  
人蔡澤爲相因封剛城君是此也 景福殿在許  
昌故城內西南隅乃魏明帝所造貲費直八百餘  
萬旣成命朝士爲賦 永始臺魏略曰黃初五年  
文帝東征留郭后于永始臺霖雨百餘日城樓多  
壞有司請移止后曰昔楚昭王出遊貞姜留漸臺  
江水至使者迎而無符不去卒沒今帝在遠未有

急而便移止未可也何晏景福殿賦云鎮以崇臺

實曰永始複道重閣猖狂是俟 洧水在縣北二

十步地理志陽城山洧水所出東南至長平入潁

過郡三行五百里詩云溱與洧方渙渙兮卽此也

讓王臺在縣南三十里漢獻帝禪位于魏王帝

為山陽公往都山陽濁鹿城百官送于此臺唐先

天元年因讓王臺立魏文廟 五女冢在縣南二

十里曹操殺皇后伏氏并姊妹四人葬于此 潁

大夫廟在縣西北一十里卽潁攷叔廟隋大業九

年重建

陽翟縣

西北九十里  
依舊四鄉

卽禹之都春秋時爲鄭之櫟邑

漢爲縣屬潁川郡又云韓分晉得南陽及潁川秦

滅韓置潁川郡於陽翟縣潁川郡地有陽關聚是

也晉屬河南郡隋初隸許州又分許洛之地以置

嵩州復以陽翟屬嵩州煬帝三年罷嵩州割隸襄

城郡唐武德初又立嵩州復隸之貞觀三年省州

以陽翟隸許州龍朔二年割入河南府今屬許州

具茨山在縣北十里 禹山後魏書地形志云

陽翟有禹山祠 偃月山洛陽記云山形似偃月

因以名之 三封山水經注云潁水故瀆東南經

三封山北謂此山也 荆山洛陽記云荆山出玉

齊武帝于此採玉其下即漢潁川郡地 杏山洛

陽記云仙人劉根隱于此山 康城洛陽記云夏

少康故邑也水經注云潁水又東歷康城南魏明

帝封尚書僕射衛臻為康鄉侯此即臻所封之地

上棘城左傳謂楚師伐鄭城上棘遂涉潁是此

也 雍城左傳謂楚為子馮率銳師侵雍梁注云

河南陽翟縣東北有雍城是也 黃臺在縣東北

四里東魏天平二年曾于此置黃臺縣屬陽翟郡

隋廢 鈞臺左傳曰夏啟有鈞臺之享注云河南

陽翟縣南有鈞臺陂水經注云連山亦曰啟筮亭  
享神于大陵之上卽鈞臺也晉地道記鈞臺下有  
陂俗謂之鈞臺陂 鳳凰樓在縣西南一里漢黃  
霸爲潁川太守鳳凰集嘉禾生霸乃起樓于郡中  
今基址存 七女岡在縣東北三十里下有七女  
泉流至長葛入洧 許由臺在縣東一十五里潁  
水上 巢父臺在縣東十六里潁水上卽巢父飲  
牛處

鄆城縣

東南一百二十里  
舊六鄉今四鄉

七國時魏之下邑史記楚

昭陽伐魏取鄆漢爲縣隸潁川郡光武謂賈復曰

鄆最大宛次之復曰臣請擊鄆光武執復手曰執  
 金吾擊鄆吾復何憂卽此城也宋元嘉二年將軍  
 劉緬說曰鄆城有百年之福若北朝保之未可敵  
 也遂遣將軍殷孝祖焚其倉糧北齊天保七年於  
 今縣置臨潁郡隋開皇三年郡縣並廢五年又于  
 廢郡城中置鄆城縣隸許州唐武德四年于縣置  
 道州貞觀元年州廢以縣屬豫州豫卽蔡州其後還許  
 州元和十二年勅淮西賊中百姓窮困相率歸順  
 其數甚多宜於許汝此係二州名行營側近置行鄆城  
 縣韓弘計議揀擇穩便處置其年十一月以今鄆



城縣爲潞州仍以上蔡西平遂平三縣隸焉是年  
十二月勅潞州宜隸許州至長慶元年五月廢潞  
州復爲鄆城縣依前隸許州其先割屬潞州所管  
上蔡西平遂平等三縣仍還蔡州尋又以鄆城復  
來屬 大潞水在縣南一里上承汝水自襄城至  
岐額城分流南爲汝水北爲潞水又有小潞水在  
縣北三十里 故鄆城楚昭陽伐魏取鄆漢書地  
理志云魏南有鄆召陵之固也 召陵故城在縣  
東四十五里漢爲召陵縣隸汝南郡隋廢春秋楚  
屈完來盟于師盟于召陵 棠谿史記蘇秦說韓

曰韓卒之劍戟出于棠谿今西平縣西界有棠谿  
村是也 征羌城在縣東南七十五里本秦安陵  
縣後漢建武十一年來歙征西羌有功故名以封  
之 蔡河在縣東南五里 唐王家在縣南二十  
五里吳王闔閭弟夫槩冢也夫槩奔楚封之于唐  
陵又地理志云封爲棠谿氏隋仁壽中置廟 葛  
伯城在縣北三十里周迴四里湯誓曰葛伯仇餉  
初征自葛卽此也 故司州城在縣西南五里宋  
文帝改汝南郡爲司州卽此也後魏太武收河南  
地至獻文改爲豫州隋開皇中自此城移入懸瓠

大業二年改爲蔡州俗呼爲盜跖城未詳其義

舞陽縣

西南一百八十里  
舊二鄉今四鄉

本漢舊縣隸潁川郡在舞

水之陽因以名縣漢封樊噲魏封司馬宣王皆爲

舞陽侯自漢至晉不改宋省其後因之唐開元四

年復于古城置隸許州 鐵冶在縣西南三十里

舞水在縣北六十里樊噲受封于此

澧音稚水

在縣北四十五里漢地理志云魯陽縣有魯山古

魯縣御龍氏所遷水經云澧水出魯陽縣西東北

過定陵入于汝地理志云定陵城在今縣北六十

里後漢書光武破王尋于昆陽士卒爭赴溺死澧

水爲不流卽此

校勘

許州

郟城縣

唐王冢夫槩奔楚封之于唐陵

按左傳定公五年九月夫槩王奔楚爲棠  
谿氏又史記吳世家及吳越春秋皆云昭  
王封夫槩於棠谿今記謂唐王又曰封於  
唐陵未詳所據

太平寰宇記卷之七終

太平寰宇記卷之八

河南道八

汝州

汝州

臨汝郡今理梁縣

禹貢豫州之域春秋時爲周王畿亦

戎蠻子之邑後爲鄭楚二國之境焉卽左傳謂楚  
襲梁及霍是也又按十三州志云梁卽周南鄙邑  
也按郡國縣道記云梁縣西南十五里有古梁國  
城存韓分晉得潁川之父城東接汝南西接弘農  
皆韓分戰國時梁屬魏秦置三十六郡屬三川郡  
在漢爲河南郡之梁縣地後漢因之魏晉爲河南

舞陽二郡之地又後魏地形志梁縣屬汝北郡後周屬南襄城郡隋開皇三年罷郡四年自陸渾縣界移伊州置于此以伊水所經爲名尋又移伊州於今陸渾縣東北置煬帝初改爲汝州以汝水爲名三年州廢以其地入襄城潁川二郡唐武德四年平王世充改爲伊州領承休梁邾城三縣貞觀元年以廢魯州魯山縣來屬其年省梁縣仍改承休爲梁縣八年改伊州爲汝州領梁邾城魯山三縣證聖元年置武興縣先天元年置臨汝縣開元二十六年以仙州之葉縣來屬天寶元年以許州

之襄城來屬仍改爲臨汝郡乾元元年復爲汝州  
梁開平四年改爲防禦州

元領縣七 今六

梁縣 葉縣 邾城 魯山 龍興 襄城

一縣廢

臨汝 併入梁縣

州境

東西二百一十里 南北二百四十里

四至八到

東北至東京四百里

西北自伊闕縣路至西京一百七十里

西至長安九百八十里

東至許州一百八十里

南至鄧州四百九十里

北至登封縣一百一十里

東南至蔡州四百五十里

西南至鄧州四百七十五里

又西南至虢州七百里

東北至伊闕縣八十里

戶



唐開元戶二萬六千五百三十三

皇朝管戶主九千五百三十五客一萬四千五百

七十五

風俗

漢書地理志云古韓地土狹而險其俗崇侈

人物

馮異字公孫穎川父城人為光武將軍諸臧宮

字君翁穎川郊樊英字季齊南陽魯陽人順

李膺穎川襄唐馬燧汝州郟城人功周允元

汝州安城人則天朝為侍郎待宴各述詩書善言允元曰恥君不如堯舜則天賞之

土產

絹 絕 鹿脯 蜜 蠟

梁縣

舊五鄉今二鄉

漢舊縣戰國時謂之南梁以別大梁少

梁也漢理在汝水之南俗謂之治城隔汝水與注

城相對其注城南面已為汝水所毀後魏於此置

治城縣高齊省入今梁縣隋大業二年改為承休

縣屬汝州取漢舊承休城為名貞觀元年復為梁

縣 明皋山即放皋山也一名狼皋山在縣南六


十里水經注云汝水自狼皋山東出峽謂之汝阨

霍陽山俗謂現山在縣西南七十里左傳哀公

四年謂楚爲一昔之期而襲梁及霍按杜注卽此  
山漢立霍陽縣因山以爲名今有故城俗謂張侯  
城是也 魚齒山連接縣界左傳謂楚師侵鄭涉  
于魚齒之下卽此處也 黃成山一名苦菜山沮  
溺耦耕卽其處也 汝水在縣南三里水經云汝  
水出河南梁縣勉鄉 溫湯在縣西四十里水經  
注云溫水數源揚波于川左泉上華宇連蔭茨蕢  
交拒方塘石沼錯落其閒頤道之士多歸之其水  
東南流注廣成澤水唐聖厯三年正月則天駕幸  
今有碑石斷折 廣成澤在縣西四十里後漢安

帝永初元年以廣成遊獵地假與貧人二年鄧太后臨朝鄧騭兄弟輔政以爲文德可興武功可廢請寢蒐狩之禮於是馬融作廣成頌以諷云大漢之初基也揆厥靈囿營于南郊右三塗左枕嵩嶽面據衡陰背箕王屋浸以波澌演以滎洛金山石林殷起乎其中神泉側出丹水涅池恠石浮磬焜耀于其陂是此澤也隋大業中置馬牧焉亦名黃陂有灌溉之利至今百姓賴之 注城續漢書郡國志云河南縣有注城卽此也 廣成城九州要記云廣成子爲黃帝師始居此城後于崆峒山

成道今此城猶有廟像存焉 崆峒山在縣西南  
四十里有廣成子廟卽黃帝問道于廣成子之所  
也按唐開元二年汝州刺史充本州防禦使盧貞  
立碑其略云爾雅曰北戴斗極爲崆峒其地絕遠  
華夏之君所不至禹跡之內山名崆峒者有三焉  
其一在臨洮秦築長城之所起也其一在安定二  
山高大可取財用彼人亦各于其處爲廣成子立  
廟而莊生述黃帝問道崆峒遂言遊襄城登具茨  
訪大隗皆與此山接壤則臨洮安定非問道之所  
明矣仙經敘三十六洞五岳不在其列是知靈跡



所存不在山之小大也此山之下有洞焉其戶上  
 出耆舊相傳云洞中白犬往往外遊故號山豕為  
 玉狗峰昔之守宰以為神居闕潔懼樵牧者褻弄  
 因積土封之今升踐其頂響連于下甚深遠云耳  
 汝北故城即高齊置汝北郡城在縣南亦名王  
 塢城以備周寇也 承休故城在今郡東即後漢  
 光武封姬常為承休公以主周祀即此城是也  
 陽人聚在州西即秦滅東周徙其君于此城是也  
 亦孫堅大破董卓軍于此地 蠻中聚即戎蠻子  
 國在今郡西南俗謂麻城是也 流盃池在城南

三十里唐則天嘗與侍臣姚元崇蘇頲武三思薛  
耀等遊宴賦詩李嶠爲序今有碑石存焉

葉縣

西南二百里舊  
七鄉今三鄉

古應侯之國後爲楚地秦爲父

城縣屬南陽郡按左氏傳謂許遷于葉又左傳楚  
白公之亂葉公率國人攻白公白公奔山而縊葉  
公遂老于邑焉漢明帝時尚書郎王喬爲令于此  
邑按唐國史云武德二年於此置葉州五年廢縣  
屬許州貞觀八年又置魯州九年廢開元四年析  
唐許二州之屬邑又置仙州至二十一年十二月  
勅以仙州頻喪長吏欲廢之令公卿議其可否中

書侍郎崔沔議曰仙州四面去餘州界雖近若據  
州城而言則亦懸遠土地饒沃戶口稀疏逃亡所  
歸頗成泉藪舊多劫盜兼有宿宵所以往來患之  
置州鎮壓今興役已畢主司粗定累年成規一朝  
廢省前功盡弃後弊方深今廢州則生患置州則  
稱煩所以武德已來迭爲廢置足明利害不專一  
塗至於田疇勞損則與許蔡何殊寧爲土卑獨當  
廢省若以州管新戶驛長難得合宜況唐許州界  
路僻戶多均出傍州非無成例州以鎮俗官以理  
人所在皆然豈憚其費然自創置未盈十年州將



員寮屢卒于位雖天道性命聖人罕言而其理分  
憂朝寄尤切視死亡而不惜何以得其歡心計不  
自安政必苟且下承斯弊爲傷必多變而通之則  
可永久河東新置舞陽縣卽漢樊噲舊國噲豐沛  
故人又高祖之姪惟勳惟舊且親且賢亦旣受封  
必稱吉土保全良吏庶在茲邦又南接白羊川口  
村聚幽僻妖訛宿宵此爲根柢自置縣以來十減  
八九今若移州鎮之便可杜絕其仙州望且未廢  
至今年十月移向舞陽縣置改爲樊州刺史司馬  
銓頗聞守法公勤望稍加慰勞使其悅以成務庶

有益于公家至二十六年十月廢大厯三年三月  
又勅置仍割汝之襄城屬仙州析葉縣南界新置  
仙鳧縣仍定爲中縣又割許州之舞陽縣蔡州之  
西平縣唐州之方城縣並屬仙州至五年二月竟  
廢縣亦仍舊各歸所屬 葉公龍家語葉公好龍  
牕壁圖畫龍形眞龍爲之降葉公見而喪其魄  
王喬鳧風俗通孝明帝時尚書郎王喬遷葉縣令  
每月朔望常詣臺朝帝怪其來數而無車騎密令  
太史候望言其臨至嘗有雙鳧從東南來於是候  
鳧至舉羅張之但得一隻烏詔使尚方驗視則四

年中所賜尚書官履也每當朝時葉門下鼓不擊  
自鳴聞于京師 方城山左傳僖公四年楚大夫  
屈完對齊侯曰楚國方城以爲城卽此也 黃成  
山聖賢冢墓記云南陽葉縣方城邑西有黃成山  
卽長沮桀溺耦耕處下有東流水卽子路問津之  
所 滄水後漢光武破王邑會大雷風屋瓦皆飛  
雨下如澍滄水盛溢士卒溺水死以萬數水爲不  
流 父城後漢馮異此地人也異始爲郡掾監五  
縣爲王莽拒漢世祖攻父城不下異出行屬縣爲  
漢兵所執異曰一夫之用不足爲強弱有老母在

城中願歸據五城以效功報德及世祖爲司隸校尉道經父城異卽開門出迎世祖卽此城也 舞

陽城樊噲所封爲舞陽侯是也隋復爲縣後省開

元四年復置縣按貞元十道錄云屬許昌至元和

十三年正月陳許二州名觀察使李光顏奏許州舞

陽縣爲逆賊吳元濟攻毀請移縣權置於吳城鎮

從之後廢故此有城存焉 昆陽城卽光武所破

莽將王邑王尋於此也在今縣北二十五里 古

冢在縣東俗云王喬葬處 葉公廟在縣東北三

里唐開元二十一年仙州刺史張景洪建古冢在

廟後

邾城縣

西北九十里舊五鄉今二鄉

左傳楚令尹子瑕城邾叔孫

昭子曰楚不在諸侯矣其僅自完者也後入晉三

卿分晉其地屬韓漢爲邾縣隸潁川郡晉隸襄城

郡後魏隸南陽郡北齊省隋移輔城縣于今縣西

北五里隸汝州大業四年改輔城縣爲邾城縣移

就今理其後因之 白龍山在縣南三十里尹村

故父城在縣東南四十里故殷時應國也左傳

楚城城父使太子建居之 邾府臺在縣東北二

十五里 薄姬冢在縣東北四十里 賈復城一

名通雅城水經注云柏水經賈復城北復南擊郾  
所築 汝水在縣西七里

魯山縣

南一百五十里  
舊三鄉今二鄉

本漢魯陽縣地左傳陶唐氏

既衰其後有劉累學擾龍以事孔甲龍一雌死潛  
醢以食夏后夏后享之既而使求之懼而遷于魯  
縣卽魯陽是也隋末王世充據有鞏洛于此立魯  
州唐武德四年世充平州廢後爲縣入伊州貞觀  
八年改伊州爲汝州 堯山俗名大陌山水經注  
云堯孫劉累遷此故立堯祠于西山焉今山亦號  
大龍山因擾龍見稱 澧水左傳晉陽處父侵蔡

楚子上救之與晉師夾泚而軍是此處也又光武  
破王尋於昆陽士卒塞于滄水是也燒車水亦  
光武燒王尋輜重于水濱因以名之皇女湯水  
經注溫泉水出北山阜七泉齊發炎熱沸騰奇毒  
疴疾浴効然無能澡其衝漂救癢者咸去十許步  
別池然後可入湯側有石銘曰皇女湯可治萬病  
亦可熟米波水馬融廣成頌曰浸以波滢是也  
魯陽關淮南子云魯陽公與韓戰酣日暮援戈  
而搗之日爲之反三舍卽此地也漢改爲關曰魯  
陽今有水俗名三雅水南自鄧州向城縣流入關

是也 故應城左傳邗晉應韓武之穆也注應國  
在襄城父城縣西南韓詩外傳周成王與弟戲以  
桐葉爲珪曰吾以此封汝周公曰天子無戲言王  
應時而封曰應侯今應鄉卽此城也 繞角城在  
今縣東南左傳謂晉師遁于繞角卽此也 犇故  
城漢縣也在今縣東南存焉 平皋故城後周于  
此置三鴉鎮在縣西南十九里亦曰平高城以禦  
寇後高齊又移于縣東北十七里置改爲魯城以  
禦後周二城皆此邑地也 魯陽公墓在露山東  
北五里去縣二十五里墓碑上有魯陽公墓四字



存焉 琴臺在縣故子城東南墻上廣二百步卽  
唐開元中縣令元德秀爲令彈琴于此 三鴉鎮  
在縣西南十九里後周築以禦高齊一名平高城

三鴉路在縣西南七十里接鄧州南陽縣界

龍興縣

東南九十里舊三鄉今二鄉

本漢邾縣地唐證聖元年勅

割邾城東南之地于此置武興縣神龍元年廢縣  
改爲中興縣其年又改爲龍興縣仍隸汝州 魚

齒山在縣東南三十里 汝水在縣西北四十里

澧水在縣東南二十八里 豢龍城在縣東南

五十里 廢臨汝縣在州西六十里本漢梁縣地

唐先天元年十二月割置於今縣西南二十里紫  
邏川置以邑城南臨汝水兼郡名為邑之稱至貞  
元八年刺史陸長源以舊縣荒殘因移於東北李  
城驛側近當大路周顯德三年廢人梁縣其地為  
鎮 洛陽界碑在舊臨汝縣西八十里 歇馬山  
在舊縣東南六十里 汝水在縣西南二里

襄城縣 南一百四十里 舊五鄉今四鄉 卽周之襄城也楚靈王所築

水經注云昔楚平王大城城父以居太子建京相  
璠曰周襄王居之因名襄城漢為縣隸潁川郡唐  
武德元年於此置汝州領襄城汝墳期城三縣貞

觀九年廢汝州及汝墳期城二縣以襄城屬許州  
開元四年屬仙州二十六年還屬許州其年改屬  
汝州今縣理卽廢汝州古襄城也 汜水左傳僖  
公二十四年王出適鄭處于汜注鄭南汜 龍城  
魏志云明帝青龍元年龍見摩陂并帝幸觀焉仍  
改摩陂爲龍陂是此地 古不羹城在縣西南史  
記謂陳蔡二國不羹是也 百尺堤後漢明帝永  
平十年築每雨水不時兗豫之人多被水害以此  
堤免之 聖泉在縣西南七里出首山上

校勘

汝州 總序

貞觀元年以廢魯州魯山縣來屬

按新唐書地理志及唐會要廢魯州皆在

貞觀九年又今記葉縣下所敘亦同此云

貞觀元年以廢魯州魯山縣來屬其年省

梁縣蓋仍舊唐書地理志之誤也當序于

八年改汝州之下

天寶元年以汝州之襄城縣來屬

按新唐書地理志及唐會要襄城縣皆以

天寶七載來屬今云天寶元年蓋從舊唐

書地理志也

太平寰宇記卷之八終



太平寰宇記卷之九

河南道九

滑州

鄭州

滑州

滑州

靈昌郡今理白馬縣

禹貢兗州之域星分角宿一度春秋

時為衛國左傳云狄入衛衛立戴公以廬于曹注

云曹衛下邑西征記云白馬城者古衛之曹邑戴

公東渡河處曹邑衛文公自曹邑遷于楚邱今衛

南縣也至成公又遷于帝邱今濮陽縣也戰國時

屬魏秦拔魏二十城置東郡是為東郡地二漢亦

然至魏黃初七年封壽春王彪爲白馬王移于韋城北五里晉初爲陳留濮陽二國十六國慕容德自鄴徙都此爲燕宋武帝平河南于此置兗州仍置東郡以爲邊鎮領郡六理于此自東晉末宋武盡得河南之北境守在此至宋末屬後魏孝文遷都于洛廢兗州以東郡屬司州後周建德六年改爲杞州隋開皇中改爲滑州取滑臺爲名煬帝初又爲郡而州廢唐武德四年平王世充復立滑州領白馬衛南韋城匡城以廢梁州之酸棗縣來屬天寶元年改爲靈昌郡乾元元年復爲滑州本義



成軍節度光啟二年改爲宣義軍避梁祖諱後唐同光元年復爲義成軍至皇朝避御名改爲武成軍

元領縣八

今四

白馬

韋城

胙城

靈河

四縣割出

酸棗

入開封府

匡城

上全

衛南

入澶州

黎陽

建通利軍

州境

東西三百

十一

一作

九里

南北

一百

五

十七里

四至八到

太平寰宇記 卷之九  
南至東京二百二十里

西南至西京一百五十八里

西南至長安一千四百四十里

東至濮州二百二十里

西至衛州一百一十六里

北至衛州一百六十五里

東南至曹州二百一十五里

西南至鄭州二百八十四里

西北至衛州一百三十二里

東北取黎陽路至相州一百三十里

戶

唐開元戶五萬三千六百三十七

皇朝管戶主一萬一千九百四十六客一千五百九十六

風俗

漢書衛地有桑閒濮上之阻男女亦亟聚會聲色生焉周末有子路夏育民人慕之故其俗剛武上氣力

姓氏

白馬郡三姓 費 成公 上官

譙郡九姓 殷 周 袁 應 和 荆 梅

齊 汝

人物

趙咨 東郡燕人拜東海相過滎陽令 成公綏 東郡

曹嵩弃印綬追至東海謁咨 白馬人閑默自守不求聞 唐崔日用 滑州靈昌人相玄宗

盧懷慎 上全

土產

方文綾 舊貢 綿 絹 花紗

白馬縣 舊十四鄉今五鄉 本衛之曹邑漢以為縣屬東郡以

地有白馬山因為縣名隋開皇三年屬汴州九年

屬杞州十六年改杞州爲滑州縣又屬焉 白馬

山在縣東北三十四里開山圖云有白馬羣行山

上悲鳴則河決馳走則山崩津與縣蓋取此山爲

名 黃河去外城十二步 州城卽古滑臺城

有三重又有都城周二十里相傳云衛靈公所築

小城昔滑氏爲壘後人增以爲城甚高峻堅險臨

河亦有臺慕容超時宋公遣征虜將軍王仲德攻

取之卽魏武破袁紹斬文醜于北岸者 逢音明

壘卽石勒之將所築遂明名姓因稱壘字今遺址

尚存 滑臺按水經注云河水右經滑臺城北小

城外大城高昌所築苻堅亂後丁零翟遼據之小城內遼弗毀漆林猶存又周嘗滑臺貯粟以擬白馬津述征記云登滑臺城西北望太行山白鹿巖王莽嶺冠于眾山表也 金隄漢文帝時河決東潰金隄卽此 山陽故城魏兗州刺史山陽公所築城因人以立名 故嘗婁城衛侯師于嘗婁卽此城也 河侯祠在縣南一里漢王尊爲太守河水壞金隄尊沈白馬使巫祝請以身代填金隄以止水水至吏士叩頭救止尊立不動水稍卻後人因立河侯祠 蒼野冢衛之賢大夫也 子路冢

在邑內 八角井在州子城外北壕下卽唐貞觀  
元年節度使賈耽所鑿公自爲記云滑城控白馬  
之津邇斥鹵之溢里居者井無良焉宰夫司庖汲  
用自遠人則勞止心曷以寧乃相土宜視水脈因  
便道求美泉得之于城壕之右鬪成八隅合爲一  
甃云云 賈魏公廟在北七里 仁風樓在州子  
城北卽晉東郡太守袁宏奉揚仁風之所也

韋城縣

東南六十里舊  
二十鄉今七鄉

古殷伯豕韋之地也左氏傳

云穆叔如晉范宣子問焉曰昔勾之祖在商爲豕  
韋氏故漢韋賢傳詩曰肅肅我祖國自豕韋國都

記豕韋氏彭姓之國祝融之後陸終第三子翦封于彭隋置縣于韋氏之國故曰韋城 參龍井在縣古城內市之東南卽參龍氏參龍之所有古石記云在右直父工日日丁下八十一口其義莫考今存 京觀在縣北二百步漢翟義爲東郡太守起兵爲王莽所滅因有此京觀俗呼髑髏臺 平陽城在縣西二十里左傳哀公十六年衛侯飲孔悝酒于平陽杜注東郡燕縣東北有平陽亭是也 師延邱在縣東南二十里史記師延紂之樂師武王殺師延于濮水收葬于此



胙城縣

西南九十里舊二  
十四鄉今五鄉

本古之胙國左傳凡蔣邢

茅胙祭周公之肩也又爲古之燕國左傳衛人以  
燕師伐鄭是也漢爲南燕縣在後慕容德都之復  
號東燕縣隋開皇三年廢東郡以縣屬汴州十八  
年文帝因覽奏狀見東燕縣名因曰今天下一統  
何東燕之有遂改爲胙城屬滑州唐武德二年于  
此置胙州領胙城又置南燕縣四年廢胙州胙城  
屬滑州 石邱在縣東北三十里俗傳漢成帝時  
星隕之石也 濮水在縣南一里西南自酸棗縣  
界流入

靈河縣

西南七十里舊十六鄉今五鄉

本漢南燕縣地今胙城是也

隋開皇十六年分東燕酸棗二縣置靈昌縣取靈

昌津以爲名後唐同光元年改爲靈河避國諱也

赤眉故城在縣東二十四里漢末赤眉賊率樊

崇築延津卽靈昌津也在縣東北二十五里初

石勒伐劉曜至河渚不得渡時流澌下因風結冰

濟訖冰泮勒自以爲得天助故號靈昌津又左傳

鄭太叔收貳以爲己邑至于廩延又曹公北救劉

延至延津皆此津也靈昌湖湖周十里人獲菰

蒲之利堯祠在縣西南五十里劉盆子所立唐

寶厯年中節度使李聽祈雨有應重修白敏中撰  
記今存 黃河在縣西十里 廢金隄關在縣西  
南五十三里漢文帝時河決酸棗縣東潰金堤大  
業二年置關十三年廢

### 鄭州

鄭州

滎陽郡今  
理管城縣

禹貢豫州之域星分氏宿古軒轅所

都之地高辛氏火正祝融之墟周初封管叔于此  
故周禮注云壽星爲鄭州之分實豫州之北境也  
國語鄭桓公爲平王司徒問于史伯寄帑與賄於  
虢鄆十邑注云十邑謂虢鄆鄆蔽補丹依畷歷莘

也此卽莘地後鄭爲韓所滅韓徙都之其東境又屬魏秦并天下屬三川郡漢屬河南郡後漢至魏因之晉泰始二年分河南郡地置滎陽郡理古滎陽城宋初如之至武帝又立司州刺史理虎牢領河南滎陽弘農三郡後魏武帝置東弘農郡尋罷之文帝又改司州爲北豫州所領如之東魏天平元年分滎陽置成皋郡理今之汜水又移滎陽理於大索城卽今之滎陽縣也屬北豫州尋又分此爲廣武郡理中牟置東中郎將府以總之高齊天保七年廢成皋郡入滎陽郡亦屬北豫州後周初

改北豫州爲滎州取滎澤爲州之名領郡如故隋  
開皇三年罷郡改滎州爲鄭州十六年于管城縣  
分置管州煬帝二年廢鄭州仍改管州爲鄭州三  
年廢鄭州復爲滎陽郡唐武德四年平王世充置  
鄭州于武牢領汜水滎陽成皋密滎澤五縣其年  
又于管城縣置管州領管城須水圃田清池四縣  
貞觀元年廢管州及須水清池二縣以廢管州之  
陽武新鄭管城圃田四縣來屬七年自武牢移鄭  
州理所於管城

元領縣七

今五

管城 滎澤 原武 新鄭 滎陽

二縣割出

陽武 入開封府 中牟 入開封府

州境

東西八十五里 南北一百九十五里

四至八到

東至東京一百四十里

西至西京二百八十里

西至長安一千一百四十里

南至許州二百八十里

北至懷州獲嘉縣八十里卽至黃河中流爲界共  
九十里

東南至開封府尉氏縣一百三十里

西南至河南府密縣一百七里

西北至懷州一百五十六里

東北至滑州二百八十四里

戶

唐開元戶六萬四千六百一十九

皇朝戶主一萬七百三十七客六千五百三十八

風俗

與滑州同

姓氏

滎陽郡四姓 鄭 毛 潘 陽

人物

潁考叔 燭之武 子產 陳平 張蒼 潘岳

潘尼

皆鄭人

唐婁師德

原武人

韋思謙

陽武人子承慶

嗣立

鄭悛

滎陽人年十七進士及第中宗朝弘文館學士

李日知

鄭人

鄭珣瑜

滎澤人

土產

梨

麻黃

鳳翮席尤佳

舊貢

管城縣

依舊四鄉

本周管叔之國杜預釋例管國在滎陽



京縣東北管城自漢至隋皆爲中牟縣開皇十六年於此置管城縣屬管州大業二年改管州爲鄭州縣又屬焉 牽渠魏書牽招字子經爲廣武太守郡中井多鹹苦人遠取汲往復七里招乃望勢鑿源開渠注入城中人賴之號曰牽渠 鄭水一名不家水源出梅山水經注云不家溝水出京縣東南梅山北溪東北流經管城西俗謂之管水又東北分爲二水一水東北流注入黃雀溝卽今之黃池 青水唐開元十道志云滎陽有青水中有魚皆青也 梅山在縣西南三十里春秋時楚爲

子馮率師侵費滑右迴梅山即此山也 圃田澤

在縣東三里 武彊城在縣東三十一里曹參擊

項羽攻武彊即此城 祭城在縣東北十五里

邲城在縣東六里晉荀林父率師與楚子戰於邲

即此城 李氏陂在縣東南四里後魏孝文帝以

此陂賜僕射李冲故俗呼為僕射陂周迴十八里

莘城國語謂史伯對鄭桓公號鄆有十邑莘其

一也又云前莘後河右洛左濟韋昭曰莘國也十

邑謂號鄆鄆蔽補丹依矚歷莘也 故市城在今

縣西北三十里漢為縣後漢省徐晃擊袁紹軍於

此望母臺鄭莊公與母誓之後悔因築臺以望之周世宗慶陵在邑界

滎澤縣

西六十里舊二鄉今四鄉

本尚書謂濟水溢爲滎之地

古按

者濟水出河北截河南流而爲滎澤自王莽末濟水但入河不復過河南

滎瀆水受河

水有石門謂之滎口石門也按今縣西南十七里

滎陽縣故城在平原上索水經其東卽漢高祖爲項羽所圍處秦立三川郡自洛陽曾移理于此晉於此置滎陽郡後魏太和中移縣理于大索城卽今滎陽縣是也隋開皇四年始分滎陽地於此置廣武縣屬鄭州廣武因山爲名仁壽元年又改爲

滎澤縣焉 滎澤在縣北四里後漢書云顯宗東

巡泰山至滎澤有飛鳥翔集因命虎賁王吉射之

鳥上下其聲吉曰鳥啞啞引弓射之洞左腋陛下

壽萬歲臣為二千石既而射鳥中之賜錢二百萬

至今滎澤亭堡之間猶多畫鳥即遺事也 廣武

澗在縣西二十里西征記云三皇山上有二城東

曰東廣武西曰西廣武相去二百餘步汴河水從

澗中東南流今無水今城東有高壇即項羽坐太

公于上以示漢軍處一曰鴻溝 衡雍左氏傳僖

公二十八年晉文公敗楚師于城濮還至衡雍作

王宮于踐土今王宮城在縣西北四十五里今故  
城內西北隅有踐土臺盟諸侯于踐土卽此也

敖山在縣西十五里春秋時晉師救鄭在敖鄆之  
閒二山名宋武北征記曰敖山秦時築倉于山上  
漢高祖亦因敖山築甬道下汴水卽此地也 敖

倉城在縣西十五里北臨汴水南帶三皇山殷仲  
丁遷于囂詩曰搏獸于敖皆此地秦置城以屯粟  
漢書曰酈生說高祖曰東據敖倉卽此也 金隄  
在縣西北二十二里漢孝文時河決酸棗潰金堤  
東郡太守興卒塞之孝成時王尊爲東郡守又加

修築至明帝永平十二年詔樂浪人王景築隄起  
自滎陽東至千乘海口千餘里防遏衝要疏決壅  
積十里一水門至順帝陽嘉中自汴口以東緣河  
積石為堰通淮名曰金隄 桑梓苑洛陽記云廣  
武城西四里有桑梓苑

原武縣

西九十里舊一鄉今四鄉

漢縣屬河南郡後魏屬滎陽郡

東魏改置廣武縣又屬焉高齊天保七年郡縣並

廢隋開皇十六年自今縣西故原武城移于陽池

故城置原陵縣屬鄭州則今理也唐初改陵為武

以復漢名 縣理古陽池城按竹書紀年曰梁惠

王十五年遣將龍賈築陽池以備秦卽此也隋開  
皇十六年于此理縣 故卷城漢爲縣按郡國縣  
道記云卽左氏晉文公敗楚師甲午至衡雍今故  
卷城是也北齊天保七年省縣而城在今縣西北  
七里曹大家東征賦云歷滎陽而過卷是此其故  
城周迴約十里又城西三十餘里有王宮城卽踐  
土所名 黃河在縣北二十里

新鄭縣

西南九十里舊  
二鄉今四鄉

昔黃帝都于有熊卽其地又

爲祝融之墟於周爲鄭武公之國按國語鄭桓公  
問于史伯曰王室多故余懼及焉其何所可以逃

死曰其濟洛河潁之間乎虢郟爲大驕貪背君君以成周之眾奉辭伐罪無不克矣若前莘後河右洛左濟主芣駝而食溱洧修典刑以守之唯是可以少固又曰惟謝邾之間言在謝之北邾之南謝在南陽後爲韓地哀侯滅鄭韓自平陽又徙都之秦并天下其地爲潁川郡漢以爲新鄭縣屬河南郡晉省宋復立隸滎陽郡東魏行臺侯景於此縣屯軍北齊省隋文十六年又置迄今爲新鄭之理焉 函陵在縣北十三里左傳僖公三十年晉侯秦伯圍鄭晉軍函陵秦軍汜南卽此處 陘山在



縣西三十里史記云齊桓公侵楚至陘山山上有  
子產墓墓壘石爲方墳東有廟皆東向卽杜元凱  
遺令所言者郭璞注爾雅云連山中斷絕曰陘

溱洧二水溱水在縣北洧水在縣南左傳襄公元

年晉帥諸侯之師伐鄭入其郛音孚敗其徒兵於洧

上又按韓詩外傳鄭國俗以二月桃花水下時會

于溱洧之上以自祓除也故詩謂溱與洧方渙渙

兮今洧水經縣之北過 溱水水經云溱水源出

密縣 古郟城在縣東北三十五里毛詩譜云郟

者祝融之墟祝融氏名黎其後妘姓處其地 苑

陵故城在縣東北三十里苑陵故城是也漢縣晉末省後魏于故城東北五里改置苑陵縣隋大業末省縣 窟室左傳鄭伯有爲窟室而飲酒朝者曰公焉在其人曰吾公在壑谷杜注云壑谷窟室也 子產廟鄭大夫猶存廟在陘山上 紀信冢信以身給楚解漢祖之圍羽怒燒之高祖使葬于此故冢存 萬歲亭後漢荀彧封萬歲亭侯于此

周太祖嵩陵在邑界自然山下

滎陽縣

西六十里舊三鄉今四鄉

縣卽漢滎陽之地唐初廢鄭州

之滎陽于滎西立武泰縣屬洛州亦曾移此額於

今郡西北五十里古滎陽縣城安置按滎陽城卽古大索亭也東虢之地左傳晉韓起如楚送女鄭子皮勞諸索氏是也京縣有大索亭者今縣所理卽大索城是也又縣東北四里有小索城存卽六國時二索也又京城太叔邑卽在縣正東郡城也秦置敖倉史記楚漢戰於京索閒酈生說高祖據敖倉之粟是此漢爲縣屬河南郡晉泰始二年分河南郡立滎陽郡取名于滎澤也後魏太和十七年滎陽自漢故理移于今所唐天授二年七月分滎陽之地置武泰縣割入洛州尋省改滎陽爲武

泰神龍元年二月復為滎陽縣以隸鄭 靈源山

按神境記云滎陽縣西有靈源山其間生靈芝石

菌其巖頂有石髓紫菊往往人聞有長嘯之聲

蘭巖山神境記云滎陽縣西有蘭巖山峭拔千丈

常有雙鵠不絕往來傳云昔有夫婦隱此山數百

年化為此鵠忽一旦一鵠為人所害其一鵠歲常

哀鳴至今響動巖谷莫知年數 嵩渚山一名小

陘山谷名周山在縣南三十五里索水所出山海

經所謂小陘之山器難之水出焉舊傳器難之水

即索水也 鴻溝在縣西即楚漢分界之所 殷

渠晉殷襄字元祚爲滎陽令時多雨襄乃課穿渠  
入河疏導原隰因致豐年時人號爲殷渠今尚存  
京水在縣東二十二里水經注云黃水發源京  
縣黃堆山東南流亦名祝龍泉泉勢沸湧狀似鼎  
湯世謂之京水也 索水在縣南三十五里水經  
注云索水出京縣西南嵩渚山與東關水同源分  
流卽古旃然水也左傳謂楚伐鄭次旃然卽此水  
名漢書云京索之間亦楚漢戰鬪之所 京城在  
縣東南二十里春秋姜氏爲叔段請京又鄭詩云  
叔出于京漢以爲縣後魏省

太平寰宇記  
卷之九  
校勘

滑州

靈河縣

延津

按晉書載記石勒傳及太平御覽所載異苑事皆謂將濟河而冰泮舟楫無闔今記云冰結得濟與二書所載小異

太平寰宇記卷之九終

太平寰宇記卷之十

河南道十

陳州

陳州

淮陽郡今理宛邱縣

昔庖犧氏所都曰太昊之墟禹貢為

豫州之域星分心宿二度周初為陳國武王封舜  
後胡公媯滿于此以奉舜祀以備三恪至春秋時  
為楚靈王所滅乃縣之後五年復立陳惠公後五  
十六年楚惠王復滅陳而其地盡為楚所有又楚  
襄王自郢徙于此謂西楚是也戰國時為楚魏二  
國之地秦滅楚改為潁川郡漢為淮陽國之地後

漢如之晉爲汝南郡梁國二境兼置豫州領郡國  
十理于此後魏得之又立爲陳郡至天平二年以  
淮南內附於此置北揚州理項城以居新附之戶  
高齊天保二年以百姓守信不附侯景改北揚州  
爲信州隋開皇十六年於宛邱縣更立陳州煬帝  
初州廢又爲淮陽郡唐武德元年平房憲伯改爲  
陳州領宛邱箕城扶樂太康新平五縣貞觀元年  
廢扶樂箕城新平三縣三年復以沈州之項城澉  
水二縣來屬

沈州卽今潁州沈邱縣

長壽元年置武城縣證

聖元年置光武縣天寶元年改爲淮陽郡乾元元



年復爲陳州晉天福六年升爲防禦州開運二年  
升爲鎮安軍漢天福十二年降爲刺史州周廣順  
元年又升爲防禦州二年復爲鎮安軍節度使皇  
朝因之

元領縣六

今五

宛邱 項城 商水 南頓 西華

一縣割出

太康

入開封府

州境

東西一百三十里 南北一百四十五里

四至八到

西北至東京二百四十五里

西至西京七百里

西至長安一千五百里

東至亳州二百里

南至蔡州平輿縣二百里

西至許州二百八十里

北至雍邱縣二百二十三里

東南至潁州三百里

西南至蔡州二百一十里

西北至開封府三百一十里

東北至宋州二百二十五里

戶

唐開元戶五萬二千六百九十七

皇朝戶主一萬一千八百六十三客一萬一千四十八

風俗

書序曰古者伏羲氏之王天下也始畫八卦造書契由是文籍生焉故文字之興起于陳州也于是風俗舊多儒學周武王克商封舜後於陳爲胡公

配以長女婦人尊貴好祭祀其俗事巫故詩曰坎其擊鼓宛邱之下

人物

逢滑

子張

姓顓孫名師

鄭當時

黃霸

袁渙

何曾

謝尚

王隱

陳郡人撰晉書八十卷

袁宏

殷仲

文

俱陳郡人

謝瞻

謝靈運

謝惠連

皆陳郡陽夏人

袁

淑

陽夏人

謝莊

土產

絲

綿

綾

絹

宛邱縣

舊七鄉今二鄉

本漢陳縣春秋時楚滅陳縣之秦漢

仍爲陳縣漢屬淮陽國後漢屬陳國晉屬梁國宋  
屬南梁郡高齊文宣帝省陳郡仍移項縣理於此  
隋文帝立陳州改項縣爲宛邱縣 陳州州城枕  
蔡水周迴三十里 洧水西自許州鄆陵縣界流  
入 蔡水自西北流入經縣東一里 州理城楚  
襄王所築卽古陳國也庖犧氏神農氏並都于此  
及楚頃襄王爲秦所伐失鄆郢徙都于此爲秦所  
滅 宛邱在縣南三里高二丈爾雅云陳有宛邱  
詩陳風云子之湯兮宛邱之上兮 清邱在縣東  
北五十里高二丈五尺古老傳云漢淮陽王常登

此邱遊望聞漢中有清邱故遙取為名 硯邱在

縣東南四十里高五丈古老傳云楚王滅陳于此

宴會軍士遂名醺邱後人語訛為硯邱 固陵在

縣西北三十里高一丈二尺按史記項羽南走固

陵即此陵也今俗呼為穀陵 辰陵亭在縣西南

四十里春秋云楚子陳侯鄭伯盟于辰陵杜預注

云陳地潁川長平縣東南有辰亭 陳佗溝在縣

北一十里上從安仁溝出入縣郭古老傳云陳公

子佗開所以灌溉也毛詩墓門刺陳佗無良師傅

也墓門有棘斧以斯之夫也不良國人知之 五

梁溝按圖經云西南十里從西華縣界洧水出東  
流入谷水古老傳云此溝有五橋渡因名焉水經  
注云洧水南經長平縣故城西又南分爲二水支  
水東出謂之五梁溝南出謂之雞籠水故水會處  
有籠口之名 淮陽城晉地道記陳城西南角有  
淮陽城漢淮陽國城也 谷水水經注云上承澇  
陂南暨犂城皆爲陂也陂水東流謂之谷水東經  
澇城北又東流入于沙水 新平城在縣東北二  
十五里漢書地理志淮陽國有新平縣隋開皇十  
六年分亳州武平縣于此置臨蔡縣大業二年廢

唐武德元年復置新平縣八年省入宛邱 博陽  
城在縣西南四十里漢書地理志汝南郡有博陽  
縣應劭曰侯國也王莽曰樂家漢丙吉所封之邑  
南陽城在縣東三十里後魏太和三年於此置  
南陽武定等縣七年廢 陳侯弩臺在縣南一里  
後漢書陳敬王曾孫寵善弩射十發十中中皆同  
黃巾賊起寵有強弩數千張出軍都亭國人素聞  
王善射不敢反叛故百姓歸之開元九年移孔子  
廟于臺上 偶臺在縣西北二十五里二臺相對  
各高二丈古老傳云淮陽王城伎樂之處一云偶



仙臺一云舞伎臺也 貯糧臺在縣南二十里古

老傳云□伐陳於此築臺以貯糧北臨蔡水下通  
江淮之利 湯井在州南門古老傳云殷湯大旱  
人民眾穿此井 鳴井在縣東三里以物投之卽  
如鐘聲 雙女陵在縣西南十三里古老傳云陳  
侯之女厲媯之陵也春秋傳隱公三年衛莊公娶  
于陳曰厲媯生孝伯早死其姊戴媯生桓公又按  
詩邶風燕燕莊姜送歸妾也注云莊姜無子戴媯  
生桓而州吁弑之二媯同死因葬于此陵 八卦  
壇在縣北一里卽伏羲于蔡水得龜因畫八卦之

壇舊有長史張齊賢文後刺史李邕除舊文撰新  
文刊之 光武廟在縣西南一里後漢書南頓令  
欽生光武登位幸南頓縣舍置酒會賜吏人復田  
租一歲父老言皇考居此日久願賜復十歲帝曰  
天下重器嘗恐不任日復一日安敢遠期十歲吏  
人又言陛下實惜之何言謙也帝大笑復增一歲  
光武崩人民立廟 東門池在縣城東北角水至  
清而不耗亦不生草木詩陳風東門之池可以漚  
麻卽此也

項城縣

東南七十里  
依舊四鄉

漢項縣古項子國春秋齊師滅

項楚襄王徙都陳以項爲別都按此城卽楚築在漢屬河南郡晉屬陳國隋文帝改項縣加城字屬陳州十六年分置沈州唐貞觀中廢沈州卻屬陳州晉時童謠云堅不過項卽此也 武邱本名邱頭在縣東南四十里魏志王淩密計廢立司馬宣王乘水道討淩大兵掩至淩自知勢窮至邱頭面縛水次卽此邱也又司馬宣王于此克定母邱儉乃更名武邱以顯武功也 秦邱在縣西南四十里古老傳云秦王苻堅將兵南征駐于此邱故名秦邱邱側有故城名曰秦丹城亦名秦王城東

晉孝武帝時秦將苻融攻陷壽春苻堅捨大兵輕  
騎赴之時有謠曰堅不過項堅出令曰敢言吾至  
壽春者拔其舌眾諫不從堅遂敗 項國城在縣  
東北一里古老傳云故項子國春秋齊人滅項卽  
此城 互鄉城在縣城北一里古老傳云互鄉之  
地論語云互鄉難與言童子見門人惑卽此也  
公路臺在縣東四里按隋淮陽郡舊圖云公路臺  
東有袁術廟按術死無後不合有廟蓋術生平立  
先人之廟 封觀墓在縣西十里漢書云觀有志  
節當舉孝廉以兄位未達恥先受之遂稱風啞不

言火起燒屋觀徐行出避之忍而不言後數年兄  
得舉稱旨而仕于郡死葬于此 賈逵碑在縣東  
南二里詞云賈諱逵字安道河東襄陵人也遷豫  
州刺史魏明帝太和二年卒梁國劉舉等爲刻石  
立碑史記上有二字生金魏志明帝青龍中帝東  
征乘輦入遼祠詔曰昨過項見賈逵碑像念之愴  
然古人有言患名之不立不患年之不長逵存有  
忠勳沒而見思可謂死而不朽者矣布告天下以  
勸將來 百尺堰在縣東北三十五里水經注云  
蔡水東南經陳縣謂之百尺溝又南分爲二水注

于潁次有大堰即古之百尺堰也司馬宣王討王  
凌陳軍於百尺堰即此也 宜祿城漢書地理志  
宜祿縣屬汝南郡王莽曰賞都亭

商水縣

西南八十里舊  
十鄉今四鄉

漢汝陽縣地屬汝南郡隋開

皇三年廢郡仍以汝陽縣入陳州十六年改為澠

水縣以縣界澠水為名 懷邱在縣西二十里史

記云吳王闔閭與子胥敗楚是年惠公卒子懷公

柳立懷公卒于吳左傳懷公不從吳卒葬在陳

棗邱在縣東北三十里隋陳州圖經曰其原邱塘

多生棗棘因以名焉 澠水從西華縣南來經縣

西四里過潁水 驛馬溝在縣西南十三里古老  
傳云楚相孫叔敖截汝墳之水以作塘下有柘塘  
陂九百頃遂乃鑿此溝其湍急如驛馬其水發孫  
塘屈曲六十里入潁 灌漑城在縣東北二十里  
隋陳州圖經云鄧艾所築也魏志鄧艾爲典農時  
於陳項以東至壽春開廣漕渠漑良田築此城  
扶蘇城在縣西南三十五里史記云陳涉起兵自  
稱公子扶蘇從人望也蓋涉築此城隋越王侗皇  
泰元年又于此城置扶蘇縣唐武德五年廢 潁  
岐渡夾河月城在縣東北三十里貞元元年刺史

曲環築以備李希烈之亂 章華臺在縣西北三

里左傳昭公七年楚子成章華之臺願與諸侯落

之杜注云宮室始成祭之爲落臺今在華容城內

是靈王所築春秋後語楚襄王二十年爲秦將白

起所逼北保于陳更築此臺 乾谿臺在縣北三

里左傳楚師次于乾谿注在譙國城父縣南又按

陸賈新語楚靈王卽位起章華之靈爲乾谿之館

作乾谿之臺五百仞之高欲登浮雲窺天 叢臺

在縣北二十五里按史記云叢臺在邯鄲城說者

以爲趙叢臺此臺蓋楚襄王所築也非趙之叢臺



名同事異按郎蔚之陳州舊圖云楚王遊觀弋釣地或稅駕于此往往有嘉禾叢生因以為名也西華城漢書地理志云西華縣屬汝南郡濟北戴封字平仲為西華令遇天大旱慨理政無感乃積柴坐其上以自焚火起而大雨暴至遠近歎服

南頓縣

南七十里舊五鄉今四鄉

本漢舊縣地屬汝南郡古頓子

國後逼于陳南徙故號南頓其城楚令尹子玉所築後漢世祖父欽嘗為此縣令故號曰南頓君

光武

生在此

宋為南頓郡東魏于此置和城縣北齊省

郡廢縣入和城隋復為南頓縣屬陳州唐武德六

年省入項城證聖元年以縣有光武鄉名符武氏  
遂于此置光武縣中宗復為南頓 高陽邱在縣

南四十里應瑒南頓人兄弟俱有名自比高陽氏  
才子故號高陽邱也 潁水在縣西北三十里

小汝水在縣西南四十里 潁陰城在縣西三十  
里按闕駟十三州志故頓子城在潁水之南故謂

之潁陰城 柏冢在縣南二十里古老傳云應奉  
冢多生柏因以為名 光武臺在縣北四十里按

隋淮陽舊郡圖云漢光武十九年幸南頓因置此  
臺兼立廟

西華縣

西八十里舊十鄉今四鄉

本漢長平縣屬汝南郡唐武德

八年爲基城縣貞觀元年省入宛邱縣長壽元年

又置爲武城縣神龍元年改爲基城縣景雲元年

改爲西華縣 宜陽山在縣東北五里高五丈翟

王河出焉 夏亭城在縣西南三十里按陳詩株

林刺靈公也胡爲乎株林從夏南注云夏南夏徵

舒也今城北五里有株林卽夏氏邑一名華亭

柳城在縣西二十里古老傳云女媧氏之都本名

媧城魏鄧艾營稻陂時柳舒爲陂長後人因爲柳

城隋開皇元年于此置柳城縣隋末廢 閻倉城

在縣東北三十里左傳云宋華向之亂公子城公  
孫忌奔鄭其徒與華氏戰于鬼閭杜預注云潁川  
長平縣西北有閭亭隋淮陽圖云閭倉城在扶溝  
縣西南五十里在今故長平縣西北 涼馬臺在  
縣西三十里相傳陳靈公涼馬臺東南去陳靈公  
陵五百七十步 集糧城在縣西十里魏使鄧艾  
營田築之貯糧故名

校勘

陳州

西華縣

總序

唐武德八年爲基城

按今記及唐會要皆云武德八年改爲基城縣而新唐書地理志云武德元年改爲箕城縣所書之年旣異基箕字亦不同又今記陳州總序亦作箕城皆未知孰是

太平寰宇記卷之十終



太平寰宇記卷之十一

河南道十一

蔡州

潁州

蔡州

蔡州

汝南郡今  
理汝陽縣

禹貢豫州也春秋時沈蔡二國之地

後為楚魏二國之境歷降為晉宋陳魏曹衛魯楚

八國之地後又為韓魏之地秦兼天下以其地為

三川郡漢改三川為汝南郡後漢魏晉如之宋文

帝于此立司州領郡四以為重鎮使孝武守之元

嘉二十七年後魏太武帝率兵攻圍汝南太守陳

憲守拒四十餘日積屍與城齊不拔而退地形志云謂之懸瓠城亦名懸壺城又水經注云汝水周城形如懸瓠故取名焉始自魏太和中幸懸瓠平南王肅起層樓于城隅下際水湄降眺栗渚殊爲佳觀故宋書亦云懸瓠爲戍以防郟坡是也皇興二年改爲豫州東魏置行臺侯景爲懸瓠都督舉十三州入梁後周置總管府尋改爲舒州以地勢平舒爲名後又改爲豫州其後又改洛州爲豫州以此爲溱州取城南溱水爲名其後又改爲蔡州以古國名之也俄置汝南郡隋初移入懸瓠卽今



州城是也大業二年廢郡復爲蔡州唐武德四年  
平王世充置豫州總管府管豫道輿息舒五州豫  
州領汝陽平輿眞陽吳房上蔡五縣七年改爲都  
督府廢輿道舒息四州貞觀元年罷都督府廢平  
輿上蔡二縣復以道州之郟城息州之新息朗州  
之朗山舒州之襄信新蔡五縣來屬天授二年又  
置平輿西平二縣開元四年以西平屬仙州二十  
六年省仙州復以西平來屬天寶元年改爲汝南  
郡乾元元年復爲豫州寶應元年避代宗廟諱改  
爲蔡州漢初升爲防禦州至皇朝因之昔宋檀和

之爲刺史出獵猛獸伏而不起亦不傷人

元領縣十

汝陽 上蔡 平輿 西平 遂平 朗山 眞

陽 新息 褒信 新蔡

州境

東西二百九十里 南北二百四十里

四至八到

北至東京四百七十里

西北至西京六百二十里

西北至長安一千四百三十里

東至潁州四百里

南至申州二百六十八里

西至唐州二百七十里

北至海州三百二十里

東南至光州淮水中流爲界二百六里

西南至唐州桐柏縣一百八十里

西北至汝州襄城縣二百八十里

東北至陳州二百六十四里

戶

唐開元戶五萬一千二百一十

皇朝戶主一萬八千三百九十七客二萬九千五百六十

風俗

漢書角亢氏之分東接汝南皆韓地其俗夸奢尚氣力好商賈漁獵難制御今其俗人性清和鄉閭孝友男務墾闢女修織紝

人物

李斯上蔡人

戴憑汝南人為侍中與百官說經書奪席五十餘重時謂之解經不

窮戴侍中

袁安

汝陽人五世孫紹字本初

蔡順

薛包

並汝南人

黃叔度

南頓人

陳蕃

汝南平輿人

應奉

汝南南頓人讀書五行並

下

應瑒

汝南人

許劭

字子將汝南平輿人評曹

英雄

呂蒙

汝陽人魯肅代周瑜之陸口蒙曰君與

因示

肅五策肅乃越席而起曰吾

呂範

汝南人

不知

卿才略至是遂拜蒙母結友

和嶠

汝南人

關羽

謂範曰早從卿言無此勞也

唐源乾曜

西

土產

舊貢龜甲雙距綾

四窠雲花鷓鷯綾

今貢龍

鳳蚊幘

澤蘭

茱萸

蟲蟲

水蛭

已上二物各二兩

著草

生石斛

汝陽縣舊八鄉今九鄉本漢縣屬汝南郡晉屬汝南國宋屬

汝陽郡隋開皇十三年罷郡屬豫州十七年改汝

陽為澠水屬陳州今界內有大澠水之名其年又

于上蔡縣東北別置汝陽縣屬豫州即今縣是也

懸瓠城亦名懸壺城水經注汝水曲屈形若懸

瓠故城取名其上西北隅魏高祖以太和中幸懸

瓠平南王肅起高堞于小城建層樓于隅阿下際

水湄降眺栗渚殊為佳觀宋書懸瓠為戍以防郟

陂其中城即懸瓠城也 鴻郟陂在縣東十里漢

書曰汝南舊有鴻郟大陂郡以為饒成帝時關東

數水陂溢爲害翟方進爲丞相以爲決去陂水其地肥美省隄防之費遂奏罷之及翟氏滅鄉里歸惡言方進請防下良田不得而奏罷陂王莽時常枯旱郡中追怨方進童謠云壤陂誰翟子威飯我豆食羹芋魁反乎覆陂當復誰云者兩黃鵠及建武中太守鄧晨使許陽爲都水掾令復鴻郟陂陽曰昔成帝夢上天天帝怒曰何故壤我濯龍池于是乃因高下形勢起塘四百餘里數年乃得立郡亦常熟今廢 黃溪水水色純黃故以名之在郡南 栗園汝水灣中有地數頃有栗園今謂之栗

五平 卷之十一  
五  
洲是也 平輿故城在今縣東汝水南舊沈子國地春秋謂蔡滅沈後屬楚爲邑平輿故城尚存

宜春城漢置北宜春縣于此故城在今縣西南尚存 安城故城漢爲縣廢城在今縣東南卽汝水北有二龍鄉有月旦里是也 四望城在縣東南梁太清二年羊鴉仁爲魏所逼糧運斷絕乃棄懸瓠歸義陽仍留夏紹停四望城防備邀道 汝南

縣城唐貞元七年正月割汝陽縣汝水之南地置縣續元和十三年勅停以地復歸汝陽 戴憑宅 憑後漢人學通九經 荆將軍廟卽六國荆卿也



昔羊角哀夢左伯桃與荆卿戰乃自刎以助伯桃  
今軻冢猶存廟像甚盛

上蔡縣

北五十五里舊九鄉今三鄉

古之蔡國左傳陳蔡方睦于

衛史記周武王克殷封叔度于蔡挾武庚作亂周公殺管叔而放蔡叔與車七乘其子胡改行率德馴善周公聞之舉胡爲魯卿士魯國理周公言成王復封胡于蔡是爲蔡仲卽此地漢爲縣迄今不改  
上蔡古城在縣西南十里 李斯墓在縣西二十里 李斯井在縣南二里 蔡岡在縣東十里 周五十里 汝水在縣西五十里

平輿縣

東四十五里舊四鄉今三鄉

古沈子國今有沈亭存焉漢

爲縣屬汝南郡高齊廢隋大業二年重置十三年

陷王世充置輿州管平輿一縣今新蔡縣西九十

里有故城卽隋之縣也唐武德中屬蔡州貞觀元

年廢天授二年重置汝水在縣西南四十三里

葛陂在縣東北四十里費長房投杖成龍處

二龍澤許劭許虔俱有高名汝南稱平輿有二龍

張熹廟熹仕漢爲平輿令天久旱熹躬爲請雨

因焚身而雨澍後人感德而廟存石母臺在縣

西百五十步葛仙公廟在縣東四十里

西平縣

西北一百二十里依舊管四鄉

本漢時舊縣春秋時古柏子

國之地後漢末廢至後魏復焉在邠南五十里屬汝南郡高齊改屬臨潁郡隋初改屬道州大業末又廢之武德初又置貞觀元年廢天授二年正月又置尋廢開元初又置後漢戴封爲西平令時旱禱祀無應封積薪坐其上以自焚火起而雨降遠近稱服蓋與陳州太康事同 棠谿蘇秦說韓王曰韓有劍戟出于棠谿卽今縣西界有棠谿村是也 龍泉水烈士傳云西平有龍泉水可以淬刀劍 二十四陂在縣界並魏典農鄧艾所置也

故西平城在縣西七十里 九頂山獨樹山並在

縣南一百里

遂平縣

西北九十里舊六鄉今四鄉

古房子國漢爲吳房縣屬汝

南郡孟康云本房子國吳王闔閭弟夫槩奔楚封于此爲棠谿氏以封吳故曰吳房唐貞觀元年廢八年又置元和十二年以吳元濟叛改爲遂平縣仍移于文城柵南新城置權隸唐州尋復還蔡州嵯峨山在縣西五十五里從唐州慈邱縣界東來 岞音峒山在縣西五十六里從唐州慈邱縣來 吳房故城在縣西南四十里

朗山縣

東南九十里  
依舊六鄉

漢安昌縣屬汝南郡張禹所封

之邑也至漢末改爲朗陵縣以境內朗陵山爲名

後魏眞君二年于朗陵故城復置安昌縣以隸初

安郡隋開皇三年自朗陵故城移安昌縣于今所

屬豫州十六年仍改安昌又爲朗山縣 淮水經

縣理南去縣百二十里 朗陵山一名大朗山在

縣北三十里 四望故城在縣東南七十里後魏

太和十一年豫州刺史王肅于四望陂南築之以

禦梁太清二年豫州刺史羊鴉仁以二魏交逼糧

運斷絕乃棄懸瓠歸于義陽上表曰臣輒率所部

縮還舊鎮留夏紹等停四望城防備卽此城也

故道城今在縣西南卽古道國也春秋云江黃道

柏是也 朗陵故城漢爲縣所治在今西南三十

五里晉武封何曾爲朗陵公卽此城也

眞陽縣南八十本漢慎陽縣地屬汝南郡梁爲白狗

堆成於此故後魏將堯雄曰白狗梁之北面重鎮

卽此隋開皇十六年改置眞邱縣唐初改爲眞陽

縣以在眞水之陽爲名 淮水經縣南去縣八十

里 眞音水出縣西北二十里注入淮 新陽故

城漢爲縣故城在今縣西南 白狗城在縣西南

七十里

新息縣

東南一百五十里五鄉

春秋息國為楚所滅漢為息縣

屬汝南郡孟康曰其後東徙故加新字後周宣政

元年于此置息州隋大業二年州廢改屬豫州唐

武德四年置息州貞觀初廢之復為縣淮水自

西流入經縣南去縣五里汝水自西流入經縣

北去縣十八里安陽故城漢為縣即左傳江國

之地也賈君祠後漢賈彪字偉節與荀爽齊名

為新息長初縣人例不養子彪嚴其制數年之間

養子千數僉曰賈父所長人思其德故有祠焉

古息城在縣北三十里 息侯廟在縣西南十里

珉玉坑在縣西南十里去息侯廟東南五步其

玉色潔白堪為器物隋朝官採唐貞觀中亦令民

採取其後為淮水所沒開元中淮水東移其坑重

出其玉溫潤倍甚昔時 王梁渠去縣西北五十

里隋仁壽年修築唐開元中縣令薛務更加疏導

西岸通管陂十六所利田三千餘頃

襄信縣東南一百五十五里舊四鄉今四鄉本漢鄗縣之地後漢光武

分立襄信縣晉屬汝陰宋武北伐改為苞信縣隋

末復為襄信縣也 淮水經縣南去縣七十五里



汝水經縣東北去縣五十五里。白亭左氏傳

楚太子建之子勝吳令尹子西召之使處吳境爲

白公杜注云白楚縣也汝陰襄信縣西南有白亭

新蔡縣

東南一百八十里六鄉

古呂國也國語當成周之時南

有荆蠻申呂周穆王時有呂侯訓夏贖刑史記蔡

叔二子遷于新蔡輿地志蔡平侯自上蔡徙都于

此故曰新蔡漢爲縣屬汝南郡晉屬汝陰郡宋屬

新蔡郡東魏孝靜帝于此置蔡州隋開皇十六年

于此置舒州領廣寧舒縣仁壽二年改縣爲汝北

大業二年改爲新蔡縣屬蔡州 漢鮑陽故城漢

爲縣屬汝南郡應劭曰城在鮦音紂水之陽 葛陂

周圍三十里後漢費長房汝南人爲市掾從壺公

學道不成思家辭歸壺公與一竹杖曰騎此任所

之則自至矣既至可以杖投葛陂中長房乘杖須

臾歸自謂適經旬日而已十餘年矣卽以杖投陂

中顧乃成龍矣後漢曾于此立葛陂縣 琥珀邱

在縣南三十里 汝水經縣南去縣二里

### 潁州

潁州

汝陰郡今理汝陰縣

禹貢豫州之域春秋時胡子之國戰

國時屬楚秦滅楚爲潁川郡地兩漢爲汝南郡之

汝陰縣也魏于此立汝陰郡司馬宣王使鄧艾屯田于此後廢爲潁川郡地後魏景明四年于此置潁州取潁水爲名高齊罷州置郡隋初廢郡大業初廢州置郡唐武德四年平王世充于汝陰縣西北十里置信州領汝陰清邱永安高唐永樂等六縣六年改爲潁州移于今治領高唐永樂永安三縣貞觀元年省清邱縣八年又以廢渦州之下蔡縣來屬天寶元年改爲汝陰郡乾元元年復爲潁州長慶二年以潁州隸鄭滑節度使漢初升爲防禦州廣順二年復爲團練州

元領縣五

今四

汝陰

沈邱

潁上

萬壽

新置

一縣割出

下蔡

置壽州

州境

東西三百七十里

南北三百三十五里

四至八到

北至東京六百五十里

西至西京九百二十里

西取陳州路至長安一千八百二十里

東至壽州二百五十八里

南至光州三百八十九里

西至蔡州四百里

北至亳州二百六十里

東南至壽州二百六十里

西南至蔡州襄信縣二百二十五里

西北至陳州三百里

東北至徐州蘄縣四百四十五里

戶

唐開元戶二萬八千一百七十九

皇朝戶主一萬五千七百一十五客一萬七千三

百

風俗 同亳州

人物

管夷吾 潁上人

應璩 汝陰人

土產

花官絅 音施 綿 已上貢

汝陰縣 舊二十六鄉今十鄉 本漢舊縣屬汝南郡魏文帝黃初

三年屬汝陰郡後魏孝昌三年於此置潁州北齊以縣屬汝陰郡開皇三年罷潁州武德四年置信

州六年復爲潁州縣皆屬焉：寢邱史記蒙恬伐  
楚之寢邱徐廣注今固始縣楚寢邱也續漢志固  
始縣有寢邱呂氏春秋楚孫叔敖戒其子我死王  
必封汝無受利地荆楚之間有寢邱其爲地不利  
可長有也其子從之楚功臣封二葉而滅惟寢邱  
不奪漢以爲縣 鄴音妻邱史記魏安釐王十一年  
秦拔我鄴邱 潁水西北自陳州項城縣界流入  
俯于城下 淮水在潁上縣西南 清邱城在縣  
東五十六里隋大業九年築置清邱縣唐武德四  
年廢 廢信州城在縣西北十五里隋大業十四

年郡城為賊房獻伯所陷其年郡民姜子建率眾

于險處作柵唐武德二年授子建信州刺史以柵

近汝南襄信縣故名信州四年復為潁州貞觀二

年移入汝陰舊城 胡城在縣西北二里春秋時

胡子之國也春秋昭公四年楚子胡子伐吳杜預

注胡國汝陰胡城是也 女郎臺在縣西北一里

古老云昔胡子之女嫁魯昭侯為夫人築臺以賓

之故俗謂之女郎臺臺上有井 汝水西南自蔡

州新蔡縣界流入東南入淮即巢父飲牛之所

細陽城漢為縣屬汝南郡故城在今縣西北四十



里 故任城在縣北一里陳將任蠻奴伐齊于潁  
水北岸築城以圍汝陰 百尺堰在縣西北一百  
里司馬宣王討王淩至百尺堰卽此

沈邱縣

西北一百二十六里舊九鄉今四鄉

漢以邱名立寢縣屬汝南

魏書云王淩欲興兵討司馬宣王宣王覺自往襲  
淩淩敗懼面縛邱頭隋開皇三年於此置沈州唐  
初州廢以地併入汝陰縣神龍二年又析汝陰置  
沈邱縣以隸信州後廢信州仍舊還潁焉 沈邱  
在縣南一百步春秋或作寢邱因邱立縣 武邱  
在縣東六十里一名邱頭司馬文王征諸葛誕屯

兵于此及陷壽春斬誕魏高貴鄉公改爲武邱

武陰城在縣東六十里按城冢記周武王祭南嶽

迴至汝水西野宿于武邱夜夢云築城在此兼祭

天地可王七百年遂城于武邱因名武陰 博城

在縣東北四十五里司馬宣王使鄧艾于此置屯

種稻以備東南築城圍倉廩 小女水在縣北

潁上縣東南一百七十里本漢慎縣地屬汝南郡吳

魏之際設關防莫謹于此隋大業二年于今縣南

故鄭城置潁上縣以地枕潁水上游爲名仍隸潁

州焉唐武德元年移于今理 關洲在縣西南四

十五里魏志云司馬景王征母邱儉使諸葛誕從  
安風津先至壽春儉與弟秀藏水邊草中安風津  
人張屬獲之卽此洲也 荆亭城在縣西南六十  
里 淮水自西南汝陰縣界流入去縣七十里又  
東北入下蔡縣界 潁水西自汝陰縣界流入又  
東流入淮 慎縣故城在今縣西北與故甘城相  
近 故甘城漢爲縣廢城在今縣西北

萬壽縣

北九十里五鄉

本汝陰縣百尺鎮也至國朝開寶六

年十一月分汝陰北五鄉爲萬壽縣以萬壽鄉爲  
名 高貴鄉郭在縣南七里古老云魏高貴鄉公

所築

校勘

蔡州

西平縣

總序

後漢戴封爲西平令

按後漢書戴封爲西華令非西平然兩邑  
皆漢汝南屬縣也

太平寰宇記卷之十一終